

auffthun/der liebe Gott werde es wol machen. So er-
 kläret sich auch König David/ da sein junges Herrlein
 todtkranc ward/ er ersuchte Gott vmb das Knäblein/
 vnd fastet/ vnd lag vber nacht auff der Erden/ aß vnd
 tranck nicht. Da aber das Kind gestorben/ stund er auff
 von der Erden/ wusch sich/ vnd salbet sich/ vnd that ande-
 re Kleider an/ vnd gieng ins Haus des Herrn vnd be-
 tet. Es kam den Rächten selzam vor/ aber der König
 entschuldiget sich/ vnd sagte: Vmb das Kind weinet vnd
 fastet ich/ da es lebete/ ic Nun es aber todt ist/ was sol ich
 fasten? Kan ichs auch wider holen? Ich werde wol wi-
 der zu ihm fahren/ es kompt aber nicht wider zu mir/
 1. Sam. 12.

Solche hoffnung haben die betrübten Eltern ne-
 ben ihren andern Töchtern auch: Der liebe Gott las sie
 vnter dessen/ hie in dieser Welt wachsen/ wie die Rosen
 an den Bächlein gepflantzet/ süßen Geruch geben wie
 Weyrauch/ wie die Lilien blühen/ vnd wol richen/ Syr.
 Cap. 40.

1. Cor. 15.

Solche hoffnung haben wir auch alle mit einan-
 der/ sonst weren wir die elendesten Creaturen/ Solche
 Hoffnung wird gewis nicht vmb sonst seyn/ Sondern
 was wir hier gehoffet/ werden wir im Himmel be-
 sitzen.

Das helffe vns die heilige Dreyfaltigkeit/
 Gott Vater/ Sohn vnd heiliger Geist/ Amen.

Die

